



Här Claude Wiseler
President vun der Chamber
Lëtzebuerg

Lëtzebuerg, de 17. Mäerz 2025

Här President,

Esou ewéi den Artikel 80 vum Chambersreglement et virgesäit, bieden ech Iech, dës parlamentaresch Fro un d'Madamm Ministesch fir Landwirtschaft, Ernährung a Wäibau an un den Här Minister fir Ëmwelt, Klima a Biodiversitéit virun ze leeden.

Rezent ass eng Taskforce zesumme komm, fir d'Risiko vun enger Ausbreedung vun der afrikanescher Schwéngspescht (ASP), déi eng seriö Gefor fir d'Schwéngszucht an d'Liewensmittellindustrie duerstellt, ze evaluéieren an entspriechend Mesurë virzegesinn. Et goufen eng Rei Mesurë festgehal, déi a Kraaft triede, wann en éischte Fall vun der afrikanescher Schwéngspescht géif zu Lëtzebuerg festgestallt ginn. Ënner anerem sollen 30 Kilometer elektreschen Drot stockéiert ginn, dee schnell kann opgeriicht gi fir eng weider Ausbreedung ze limitéieren. Des Weidere sollen zwee nei "Centres de ramassage" fir Wëld opgemaach ginn zu Nidderfeelen an zu Maarnech an et solle Sichhënn ausgebilt gi fir doudegt Wëld opzespieren.

Dozou hätt ech folgend Froen:

- No wat fir enger Method an iwwer wat fir eng Zon gëtt den elektreschen Drot opgeriicht wann e Fall vun afrikanescher Schwéngspescht detektéiert gëtt?
- Wéi schnell sinn déi zwee nei "Centres de ramassage" operationell?
- Wéi schnell kenne Sichhënn ausgebilt ginn, fir doudeg Wëllschwäin ze fannen?
- Wat fir eng Hëllef si fir d'Bauere virgesinn, déi am Fall vun engem ASP-Ausbroch Verloschter maachen?

Mat déiwem Respekt,

Claire Delcourt
Deputéiert



**Gemeinsam Äntwert vun der Ministesch fir Landwirtschaft, Ernährung a Wäibau a vum Minister fir
Ëmwelt, Klima a Biodiversitéit op d'parlementaresch Fro n°2097 vun der Deputéiert Claire
Delcourt**

- **No wat fir enger Method an iwwer wat fir eng Zon gëtt den elektreschen Drot opgeriicht, wann e Fall vun afrikanescher Schwéngspescht detektéiert gëtt?**

Den elektreschen Drot ass eng vun den alleréischte Moosnamen, déi ergraff ginn, wann e Fall vun ASP bei engem Wëllschwäi bestätegt gëtt. Et geet drëm ze verhënneren, dass infizéiert Schwäin de Virus aus der Zon erausdroen. Wéi grouss déi Zon ass, kann een net am Virfeld festleeën. Hei musse verschidde Krittäre berécksiichtegt ginn: Geographie, Vegetatioun, natierlech Grenzen, Ausbreedung vun der Krankheet, Den Drot gëtt no engem bewäerte Prinzip mat 3 Litzen a genau definéierten Ofstänn zum Buedem a Plastikspéil kombinéiert mat hëlze Péil opgeriicht. Dëst huet de Virdeel, schnell an einfach kënne virzegoen an trotzdeem ze garantéieren, dass den Drot effektiv ass a keng Schwäin duerch ginn. Aktuell verfüge mir iwwer e Stock vun 30 km elektreschen Drot.

- **Wéi schnell sinn déi zwee nei "Centres de ramassage" operationell?**

Déi zwee nei Centres de ramassage sinn derbäi geplangt ze ginn. Falls et kuerzfristeg zu engem Ausbroch vun der ASP géif kommen, an zousätzlech zu de besteeënde Zentren dringend weider Zentre gebraucht géife ginn, kéinte provisoersch Sammelstellen opgeriicht ginn. Dat néidegt Material dofir steet zur Verfügung.

- **Wéi schnell kenne Sichhënn ausgebilt ginn, fir doudeg Wëllschwäin ze fannen?**

Mir hunn en Appell un d'Centrale de chiens de chasse gemaach a sinn am Gaang d'Konditiounen, déi se mussen erfëllen, souwuel d'Leit wéi och d'Hënn, auszeschaffen. Et ass geplangt, zäitno mat der Ausbildung unzefänken, fir dass d'Hënn fir den Noutfall d.h. d'Detektioun vun engem Fall vun Schwéngspescht, asazbereet sinn. Fir d'Ausbildung selwer muss een ongeféier 6 Méint rechnen.

- **Wat fir eng Hëllefën si fir d'Bauere virgesinn, déi am Fall vun engem ASP-Ausbroch Verloschter maachen?**

Vu dass an enger 1. Phase virgesinn ass, d'Keulung vun alle Schwäi vum Betrib, op deem d'ASP detektéiert gouf, ze ordonéieren, gëtt de Bauer fir de Verloscht vu sengen Déiere vum Staat entschidedegt. Ausserdeem kënnen eng eventuell Zerstéierung vun infizéierte Material wéi och d'Onkäsche fir d'Botzen an d'Desinfektioun vum Betrib vum Staat iwwerholl ginn.

Wat den Ausfall vum Ëmsaz vum betraffene Betrib resp. de Betriber, déi an der Sperrzone leien, betrëfft, kann eng Assurance ofgeschloss ginn, vun där de Staat 65% vun de Primen iwwerhëlt.

Lëtzebuerg, den 28. Abrëll 2025

(s.) Martine HANSEN

Ministesch fir Landwirtschaft, Ernährung a Wäibau